

ASO TOFI, 16 SETEMA 2021

Na nofoia e le Fofoga Fetalai le Nofoa i le itula e 9:40 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taulumaga a le Fono Aoao Faitulafono.

Ia, avea ia lenei taimi ou te faafeiloai aloaia atu ai i le paia o le Maota i le afio o lau Afioga i le Palemia faapea foi le mamalu o lau Kapeneta. E faafeiloai atu foi i Minisita Lagolago ma sui usufono mamalu uma o le Maota Fono.

E faatalofa atu foi i Ofisa Sili o Pulega o Matagaluega ma Faalapotopotoga Tumaoti a lo tatou Malo, aua lava o latou faiva o le tautuaina o le atunuu.

E faatalofa atu foi i le tapuaiga a Le Ao Mamalu o le Malo ma le Masiofo, faapea foi le Sui o le Fono a Sui Tofia ma le Faletua, aemaise foi le afioga i le Faamasino Sili ma le mamalu o le Faamasinoga, ae a le tapuaiga mau a lo tatou atunuu mai lava i ona mauga tetele seia oo i ona mauga iti, aemaise foi o le tatalo ma le tapuaiga a le aufaigaluega paia a le Atua.

Ia ou te manatu i lenei taimi i le paia o le Maota, e faatulou atu i le Maota ma le tofi na faufau ai ti'a. I paia fesāga'i ma le piialiti o le tulutulu vaililo o atisa o le matavai failelea o le tafatolu. Ua natiapaesina le toaiga o figota o le moana uli, ua le o se malama la na saia i le ata, ae o tupe ua sūsū'u. I le agaga e tumu i le faaaloalo, e le faigofie, ma e le taugofie le tausiga o le Nofoa o le Palemene, aua e mou le tagata, tulou le gagana, ae tumau pea le Palemene a le atunuu, i le soloai mai o auga Tui ma Tula, ae faapea i mauga ma tolotolo faitauina o le atunuu. O Samoa ma lana Palemene, e faavae i le Atua, le Tama, Le Alo ma le Agaga Paia.

E le o toe po se lilo i le tolopo faafuasei ai o Taulumaga a le Fono Aoao Faitulafono i le aso ananafi ona o tunuma e le momoe faatasi. Ua molimau foi i nisi o faasalalauga ua alu i le lalolagi, ma ua foliga mai, ua tuu le maa ae ua maa i aau. O Samoa, o le ua faalanumaaveave e sapi i lana aganuu ma le faa-Kerisiano, ma e faasili foi le sao tagata nai lo le sao mea. Ua silasila faafofoga le atunuu ma le lalolagi i le aso ananafi ma ua tuuaia ai le Fofoga Fetalai. Peitai, ua le o lena le agaga ma le faamoemoe. E tau lava ina ou faamanino, e le tuulafoaiina e le Fofoga Fetalai ana matafaioi faale-Faavae e tausi ai le mamalu ma le taualoa o le Nofoa ma le Palemene o le atunuu.

Ua maea ona faasalalau faalauaitete le anoliu o finagalo o le Taitai ma le Vaega Faaupufai e Puipuia Aia Tatau a Tagata. O i ina o lo o manino ai lo latou le amanaia o le Fofoga Fetalai. O lo o i ai pea lo latou talitonuga tetee i le faaiuga a le Faamasinoga na aloaia ai le tofia ma le filifilia o le Palemene Lona XVII ma le Faigamalo fou ua i ai nei.

O itu maaleale e ao ona silafia e lenei Maota ma le faafofoga a Samoa, o le a tau ina se i ou toe faamanino vaega taua, o le faaiuga faaletulafono, o tofiga aloaia o le Faigamalo o lo o i ai nei, e pei ona i ai mafuaaga na faavae ai le Faaiuga a le Faamasinoga o Talosaga aso 23 Iulai 2021 i lona parakalafa e 55 itulau 15. O i ina o lo o ua talia ai e le Faamasinoga o Talosaga le mau faaletulafono a Mr Robert Lignal QC sa tulai mo le Sosaiete a Loia. O i ina o lo o ave ai le mau ma ua talia e le Faamasinoga o Talosaga. E tatau i so o se sui filifilia i totonu o le 45 aso ona auai i le Fonotaga muamua, auai i le Fofoga Fetalai faatasi ai ma le faatautoga. O faaeteetega ia o lo o liolio i ai le Fofoga Fetalai na mafua ai ona le faataunuina le faatautoga mo sui usufono mamalu o le Vaega Faaupufai e Puipuia Aia Tatau a Tagata ma faia ai loa se faasilasilaga aloaia i le aso 13 o Setema 2021, e le tatau ai ona auai i taualumaga o le Palemene o lo o faagasolo nei. Ae le faapea o le a aveesea ai o latou tulaga o sui usufono na filifilia mai e le atunuu. O lo o manino aiaiga faale-tulafono, o le Fofoga Fetalai na te faatautoina uma sui usufono uma o le Maota lenei, ma o lo o manino foi se faamatalaga na tuuina atu i le Taitai ma le Vaega e Puipuia Aia Tatau a Tagata. E pei ona taua i luga, e i le Fofoga Fetalai le faaeteetega ne i mea ane ua maoaluma i se faaiuga ae le o tusa ai ma ala o le Tulafono. Peitai, ua sosofa mai lava i se auala le aloaia e pei ona molimauina e le atunuu i le aso ananafi i lo latou naunau e faalavelaveina taualumaga a le Palemene, ae ua solia ai le aloaia o le faasilasilaga na ou tuuina atu.

Talofa ua savalia le ala e le Afioga i Le Ao Mamalu o le Malo ma le Masiofo, le Sui o le Fono a Sui Tofia, le paia i le Fono a Ekalesia Soofaatasi ma auauna o le Talalelei, ae o lo o to'a pea le tai i le Palemene.

O ananafi na ma savalia ai ma le Afioga i le Palemia le Maota o Le Ao mamalu o le Malo i Vailele mo se faamaninoga o lenei mataupu. E faafetaia ai foi lana Afioga i Le Ao Mamalu o le Malo faapea le Sui o le Fono a Sui Tofia mo lo laua finagalo malamalama. Ui i lea, o lea ua taunuu i luma o le Faamasinoga lenei mataupu, o se laasaga taua tele, ina sei toe faamanino atili mai e le Faamasinoga ia aiaiga o le faaiuga e pei ona ou tolaulauina atu.

O le a foi le faaiuga o le a tuuina mai, o le faatonufulau lena o lenei mataupu.

Ma e tusa ai ma Tulafono Tumau 85(1) ou te le faatagaina se saunoaga a lenei Maota e faasino i lenei mataupu, a o faatali se faaiuga faa-Faamasinoga. O le a le faatagaina foi so o se tagata e ulufale i lenei Maota po o le faataamilosaga i fafo o le Maota faatasi ai ma malae o le Fono Aoao mo se faamoemoe o le finauina o lenei lava mataupu.

Lau Afioga i le Taitai ma le Vaega Faaupufai e Puipuia Aia Tatau a Tagata, ia malu ave i fafo i a tatou feeseeseaiga. E fai foi o lena a o lenei. O le agaga o le Nofoa, ia o tatou tausii le mamalu ma le taualoa o le Palemene.

Lau faafofoga tapuai mai Samoa faapea le Fono a Ekalesia Soofaatasi ma auauna uma o le Talalelei, ia malie afenoa. E talitonu le taofi, o lo outou naunautaiga ia filemu ma fealofani lau Palemene, a o lena foi le manaoga o le Nofoa. Ou te fautuaina foi le paia o lenei Maota, ina ia o tatou tausolomua pea i le tausiga o le filemu. O a faigata e oo mai, ia o tatou onosai ma ia maua le loto faamagalalo. O le loto faamagalalo ua na o i latou e i ai le amiotonu. A o upu foi o ana Afioga Paia, “Aua e silafia e le Atua le ala o e amiotonu.” Samoa e, e leai se mea lilo i le silafaga ati a lo tatou Atua, ua na o Ia foi e malu ai i tatou mai puapuaga o lo o faatali mai i le ala. Lafoai ia ni o tatou lagona faaletagata, a ia tatala atu o tatou loto e nofo tupu ai Keriso lo tatou Faaola, ina ia faia e ia se loto fou ma se loto mau mo i tatou. Ia tumau pea le filemu o le Atua ia Samoa seia oo i le faavavau. Soifua.

Afioga Hon Fiamē Naomi Mataafa (Palemia): Lau Afioga i le Fofoga Fetalai, e faanoi atu mo se avanoa.

FOFOGA FETALAI: Tulai mai lau Afioga i le Palemia.

Afioga Hon FIAME NAOMI MATAAFA: Faafetai o lea ua taoto i Maota nei le tanoa i lau Afioga i le Nofoa, ua maua foi le auga o le saunoaga, ona o mea na tutupu ananafi. Faafetai foi ona ua talia se talosaga e faamalolo le tatou Fonotaga ona o nisi o tulaga na aliaie mai. Ae ou te faafetai atu e fai ai au ma sui o le Malo i Afioga i Minisita o le Kapeneta faapea foi le la itu i Afioga i sui usufono. Ua maua le auga o lou finagalo, o le ala lava lea sa tatou uia o le ala o le Tulafono. Ma e atonu o i ina e maua ai le mapu o lenei lava mataupu sa tatou malaga mai ai talu mai le tatou faiga palota i le aso 9 o Aperila.

O lau Afioga e faauluulu i ai le Palemene o Samoa, o le Maota o le atunuu. Ma ua matou taofi ma matou faamauina o le a usitaia le finagalo ua e faaalua. Faafetai i lou finagalo malamalama, aemaise o lou finagalo o lo o toafimalie e tapasaina ai le tatou galuega ma le faamoemoe o le atunuu.

O sa matou upu lea e talifuaitau i le saunoaga a lau Afioga i lenei taeao. Faafetai.

FOFOGA FETALAI: Faafetai tele malele i lau Afioga i le Palemia o le Taitai o le tatou Malo. Ua faalogo foi vaotutui le paia o le Maota aemaise o Samoa. E talitonu foi o lea ua e saunoa tonu lava i tulaga o le tatou tiute faa-Palemene ina ia maua pea le toamalie ma le toafilemu o le atunuu, e afua atu ia i tatou o taitai ua tofofi mai e tatou itumalo ona maua ai le filemu ma le toamalie o le atunuu.

Faafetai tele i lau Afioga i le Palemia mo le faalaeiau aemaise foi o le lagolago mai i se tulaga o le Nofoa ina ia tatou tausia pea le mamalu ma le tausiga o le tatou Palemene. Faafetai tele i lau Afioga i le Palemia.

TULAFONO TAU FAAOFI O LE FAATATAUINA O TUPE 2021/2022 – felafolafoaiga i luga o le faitauga faalua – Aso 3

FOFOGA FETALAI: E tolopo Galuega a le Fono Aoao i le aso Fono ananafi o lo o saunoa le sui usufono mai Vaisigano Nu.1.

Ia o le avanoa lenei e tulai mai ai le sui usufono mo Vaisigano Nu.1 e faaaauau lau saunoaga. Lau Afioga i le sui usufono mamalu Vaisigano Nu.1.

Afioga NIUAVA ETI L MALOLO (Vaisigano 1): Lau Afioga i le Fofoga Fetalai, e manatu o lea ua mapu i le tuasivi le fagotaga a tamaseu o le talalelei. Sa e faatamaseu e momoli lapalapaomalo. Ou te manatu o lea ua fusi le fau o Malo, tosi le pa ti teevao, ua afio mai le Agaga o le Atua e toomua i galuega a le Palemene. Ua ou manatua ai i le aso le taaseuga a Tagaloa Funefeai i le tuavao sa feiloai ai ma Malietoa Laauli. Fai mai le fesili a Tagaloa ia Laauli, “Se Laauli, se ua feilafi mai lou titi.” O le a lena? Fai mai le tali a Laauli, “Tagaloa, o lupe nei na vaoesese, a o lenei ua fuifui faatasi.” E manatu ua faapena le taeao lenei vaeane le fala faaepa o le Palemene o Samoa.

Ou te muai faatalofa atu ai i lau Afioga i le Fofoga Fetalai, lea ua maalo le iuofe, ua e faamanino aulape. Faafetai, malo le lototele.

E faafeiloai atu i lau Afioga i le Palemia ma lau Kapeneta, malo le lototele. E le i soona faalataina e Iuta le tatou Faaola. A na le faalata e Iuta le Faaola, e le tau le misiona a Iesu na afio mai ai. E le te i foi tutu Koliata e faafetoai Tavita. Aisea? A na le i ai Koliata, e le tupu Tavita. E aoga mea e tutupu e tosi ai le laina ma mumu ai le moli e taitai ai ma faalototeleina ai lau Afioga i le Palemia ma lau Kapeneta ma le Palemene o Samoa.

E muta le aso ananafi ia ua oo le tala a le usugafono a lenei itumalo i le Vaega lea o Punaoa Faalenatura ma le Siosiomaga, le vaega lea o otaota ma otaota lafoai. O lea ou te matau atu i le tulaga i le Tala o le Tupe, e \$4 miliona lea e faataoto agai le vaega lea o le Waste Management. Ae o le tasi lenei o faafitauli o lo o ua tupu i totonu o le atunuu lenei, e oo lava i aiga ua paepae solo tulou lapisi ma otaota.

Lau Afioga i le Minisita na o nai mafaufauga, e a pe a manaia ae faatu se vaega tumaoti mo le waste disposal and management, e manaia tele lea mo le agai i luma. Ua tele le faafitauli ae laiti tagata ma le Matagaluega e feagai ma lenei vaega. O lea foi ou te matau atu i le faataotoga o le Tala o le Tupe, o lea e i ai tupe ia e faamatu i konekarate mo le moavao lea e faatino i fanua faasao o le Malo. E tupu se manatu o lenei usugafono ona e tele foi fanua

faasao o le Malo i lou foi itumalo. O le manatu, manaia ae faataoto konekarate ae aumai le seleni lea e tuu i taulelea po o afioaga e fai ai le latou tautua, tautua tuavae i le nuu ma afioaga.

Ia, ona oo mai lea o se faasologa i lau Afioga i le Minisita o Galuega, Felauaiga ma Atinae Esee, lau Afioga Olo Fonoti Fiti Afoa Vaai. E le o se faanee lau Afioga, leaga o oe o le toe Ulutaia o le Maota lenei i le Itu Agai. Ua leva ona tafetotoi tulou ou fofoga ma lou tino, ua pupu lou tino, a o faia lau galuega o le agaia o le Malo. Ae tau foi ina faamanino i lau Afioga, o lau Afioga na faaosofia ai moegaluo ia Niuava e sau i totonu o le Palemene lenei. Na musumusu loa le agelu a le Atua ou te tu i luga e tapena pulu o le vaa, ae maalo ane loa ma Olo Fonoti i ou luma. Faafetai i le loto toa, malo le tau toatasi. Fonoti, e le tau selu atu, o oe o le tupu, o le uluai tafaifa, ae a ta foi i le isi itu, o oe o Mooui, o le faautama o Aiga o Samoa. Ae fia faaleoina le agaga o le faafetai i lau Afioga i le Minisita, ona o le 20% lea ua toesea mai le tau o le vai ma le EPC. E ui lava e pei o se mafuie gatete i lou tino o le a toe aveese atu isi au seleni, ae ua e le manatu i le lauamanu, ae ua e silasila i le faamulioatu.

Ona oo mai lea o le talanoa i le uafu. Faafetai o lea e matau atu o lea e i ai le tupe lea e faaagaaga mo le fausiaina o uafu. Faamolemole lau Afioga i le Minisita, se i e silasila ane lava i le uafu lea i Asau e faalatele ma faaloloto le ava. Toe pau lava lea o le mea lea e tupu, o le uafu ua matua uafu matautia, peitai, ua toe ola le amu i totonu, ua amata ai ona papau le ala lea o le ava i Asau. Ae o se talosaga foi i lau Afioga, leaga sa ou vaai ai i aso ia i le faalateleina o le ava, sa tatui le ava i fanai'a. Faamolemole lau Afioga, e le toe manao le Itu Asau ma Vaisigano Nu.1 e toe vaai i ni mea tatui. Vaai se isi technology e faifailemu i lalo o le sami ina ia aua ne i afaina figota ma le tele o le punaoa o le sami o la ua faamanuiaina ai lea itu o le atunuu. A faatino le vaega lea o le faateleina o le gutu lea o le ava, ona agai mai loa lea o vaa container ma meli laupasese e afea le uafu lea. E fesoasoani atili i le tourism sector i Savaii. E matagofie foi ae avatu nisi pisinisi e faatutu i luga o le uafu. E tele pisinisi la e ou te vaai i luga o le uafu lea i Matautu la e feomai solo ai. E i ai le vaega lea e lauina le i'a i fafo, le transshipment o container e ave. E manaia ae uma loa na fai le uafu sii atu loa ma le pisinisi lena e faatino i Asau, e maua ai galuega a le motu o Salafai, ae sili ai ona maua ai se tupe mo lea foi itumalo. Ia a mafai foi ona faatino ai se fale i'a e pei o le Star Kist e maua ai galuega a lenei itumalo, ia ua manaia tele.

O auala galue lau Afioga i le Minisita. E i ai le auala lea e ui atu i i i Masamasa lea e tele ina faaoga e le Ofisa o le Vaomatua. Masalo o lea e molimauina e le Minisita o Faatoaga lea sa alu ai le asiasiga. O le matua faaletonu lava. Ae a faalelei atu le auala lea e fesootai ma auala galue o Asau, fesootai ma auala galue o Auala ma Vaisala, oka se matagofie. A o le tatalo foi a lenei itumalo, e le mananao lenei itumalo e faata ni auala galue o matou. Na pau lava le mea o le tanu lelei, compress faalelei, fai faalelei alavai ona

e talitonu lea, e le mafai ona faaleagaina le auala. Sefe le tupe mai le faataina, e alu atu lava aua o le molimau lena o lea ua i ai. E i ai isi auala galue e aluatu lava le ta tau lelei i lalo o le mauga. E le mananao ai le Vaisigano. Na o le fai faalelei lava o alavai, e te talitonu mai, e uma atu lava le Paeaiga a Niuava ua valaau le Atua tulou, o lae lava e lelei.

Ia, ona oo mai lea i lau Afioga i le Minisita o le Soifua Maloloina. Faamalo i lau Afioga i le Minisita ma le Minisita Lagolago. E le moe lau Minisita Lagolago i Savaii, e fealuai solo e felogonai faifeau, o pulenuu e faatino le tui o le koviti-19. Se amuia oe i lenei Minisita Lagolago, e mataala. Ae ua na o se tuualalo lau Afioga, toe faamalosia a tatou village health centre foi lea i nuu taitasi. E ese le taua o lea vaega i aso ia. Lena sa ou vaai ai i aso ia, sa ou tietie ai i luga o le tamai solo lea sa uu e loomatutua e fua ai, sa ou tietie ai i luga. A o le taua ia o le fesootaiga lea, e oo atu i le falemai, o le tele ia o le galuega e maopoopo ai le galuega a lau Afioga. Ma le ta falemai i Sataua lau Afioga, lelei le afaigaluega. Faafetai ua mautu le fomai o lo o nofo ai. Pau le mea la e tupu, e tusi lava i Sataua le talavai, ae tele ina tala atu i Tuasivi. E tele ina leai ni fualaau, leai ni vai. Ae silasila lau Afioga. E le faigofie le sau mai tua, o le siusiu o Salafai le mea e goto ai le la, e sau i Tuasivi e tala atu le penitolo ma isi fualaau. Ma faamolemole lau Afioga, o le tatou afi faaleoleo o le falemai lea i Sataua, sa i ai se taimi sa faaletonu ai. Se i toe silasila ane ma tuu ane i lalo o lau lisi aua foi lea vaega.

E tele mea o tutupu i le tatou falemai autu, faamolemole lau Afioga, se i toe vaai le tatou oxygen plant lea i le falemai i Motootua, o mea sili ia ona aoga. E uma loa le manava, e manaomia le okesene. Ae a uma le manava ae leai se okesene, oi soma e le au uso e. E manaomia le toe fai o le tatou oxygen plant, ia toe faalelei atili ma se i toe vaai ane le tatou CT Scanner, aumai loa i se taimi lenei e fesoasoani i le paia ma le mamalu o le atunuu o lo o o atu ae o lo o faaletonu le CT Scanner. Ave nisi tagata faigaluega i fafo e aoaoina lelei e le gata i le faiga, repair, a o le operate ina o le Scanner lea. Ia faamanuia le Atua i lau Afioga, aemaise foi o le Ofisa Sili o Pulega ma le Pulega.

Ona oo mai lea o se faamatalaga i le Matagaluega o Fesootaiga ma Faamatalaga Faa-Tekonolosi. Ia, o le tatou Samoa National Broadband Highway (SNBH). E matauina lava ma le totoa i le tatou Tala Faatatau o le Tupe le tele o le vaegatupe o lo o faaagaaga i le vaega lea. E 11 tausaga o ou faiaoga i Savaii, ou sau iinei i Apia, 5 tausaga o ou faigaluega i Avele, ma agai mai i le Matagaluega, o ou faalogo lava i le Broadband lea o le Highway. Ia ua tataua ona saosaoa e pei o taavale o le motor way. Ae a le taimi lenei? O lae lava e struggle lava faiaoga i Savaii e tau fesootai le initaneti e aumai ai fesootaiga e faigofie. E na ona tuu atu i autafa o lau Afioga i le Minisita, ae faamalo le galulue i lau Afioga aemaise foi o le Ofisa Sili o Pulega ma le Pulega.

Ia ona oo mai lea i le vaega o le Minisita o Leoleo ma Falepuipui. Manaia ia o le suiga lea ua fai i le faiga palota lea na tea nei, e agai uma i latou i Savaii, ae fai pea pre-polling a tagata matutua. O le mea e fia momoli atu, leaga sa ou vaai ai i aso ia. E malo mai ua fai le pati, ua onana le pati i Savaii ae toe alu atu le tala i inei i Upolu ua faiaina, ae toatele atu tagata i Savaii, ae tupu le mea i inei. Faamolemole lau Afioga, se i toe silasila lava i le vaega lea. A fai e leai, o fua uma tagata Savaii i le aso o le palota. Aua o le mea lea o lea na tupu, o le tele o faamasinoga lea na fai, na molia e le isi sui le isi sui i le alu la'u tagata. Oi a faafefea? E lelei lava i itumalo latalata mai, a o le siusiu o Salafai le itu Asau e le iloa pe faafefea. E leai ni pasi, e manaomia le tu atu o le sui faatu e alu e momoli tagata. Toe mafaufau ma tuu atu aua le faatofalaiga a lau afioga.

Ma lau Afioga i le Fofoga Fetalai, e le toe autalatala le tautua a lenei itumalo mo Samoa. Sa tautua lenei itumalo ma taitai i le taimi o le nofoaiga a le aloalii ia Vaai Kolone, ma le tele o tamalii sa nofoia le Nofoa lenei. Sa i ai foi ona sui i le Fono Faavae o Samoa, ua leva ona tautua eleele o lenei itumalo e oo mai lava i le aso, mo Samoa ma lona atinae. Ae talitonu mai outou, e leai ma se faalavelave o lenei itumalo i galuega a le Malo e fai atu.

Lau Afioga i le Palemia, o se tautaualemau a lenei usugafono, a o mata foi o maasiasi e talatala lenei ua i ai le Nofoa o Vaituutuu. Lau faatufugaga Saleaula, ua taoto le tofi o le Pule a Finao, Palauli ma Satupaitea. Ae aisea ua le aumaia ai se tofi o Matia Matia Ituau ma Safotulafai, o isi pule faitauina o Savaii. O le tatalo a le Vaisigano Nu. 1 lau Afioga i le Palemia, o le Sao na Faapito ma lau Faigamalo. Pe le ua alagatatau ea ona faamatuu mai le vaega lea, se Nofoa o Vaisigano si ou nuu i Asau, o le afioaga o aiga ma Salafai. Lau Afioga i le Minisita, ou te le selu atu o oe o le fao matua o le saofaiga, o le afioaga o aiga ma Salafai. O le siu o faalupega o lo tatou nuu, o lau vagana Mua ma Fao ma le pule a Vaisigano. Faualo Harry Jeffrey Schuster, e tatau ona oo atu i le isi faiga palota ua maoti se tofi o si ou nuu o Asau. E faaigoa o le tofi o Matia Matia Ituau ia ona Vaisigano 1 lea o Vaisala ma Auala. Faamanuia le Atua i lau afioga, aemaise foi le Ofisa Sili ma le Matagaluega.

Ona oo lea o se faamatalaga i le Minisita o Tiute ma Tupe Maua. E 2 lava nai mea ou te fia faailoa atu. O au ma lou olaga i Salafai ou te savali atu lava i le isi pito o le matou aiga e tu i le isi pitonuu, e ave le suavai a le faifeau, Aso Sa uma ma Aso Sa uma. A lea ua pale i le aso le tautua sa fai. Faamolemole lau Afioga i le Minisita, aveese tax a faifeau, cut it now, stop it, right now. Lau Afioga, se i toe silasila ane i le tatou green lane, ua leva ona ou faalogo i lea mea ou te le iloa, faapea foi au e tatau ona i ai le blue lane, green lane, orange lane, ae o lea faatoa ou malamalama nei i le mea lenei. Se i toe silasila ane lau afioga i le faataotoga o vaega nei.

Ia manuia lau Afioga i le sui Palemia lau Afioga i le Minisita, ma lau Matagaluega.

Ona faaiu lea o sau faamatalaga ou te toe faaiu lava i le Minisita o Tupe, leaga o le auga lena o aute o le faamoemoe i le aso. O anapo e le maua sau moe, aisea? Leaga foi ou te meeme e i le Tala o le Tupe. E pei o sau miti, ou te miti miti ai pea i lenei vaiaso.

FOFOGA FETALAI: Toe 3 minute o le sui usufono.

Afioga NIUAVA ETI L MALOLO: Ae lava lava lou lagona faanoanoa. Ia o lea o le a faauma atu lau Afioga i le Fofoga Fetalai. E i ai lava le faanoanoaga lea e ia te au lau Afioga i le Minisita. Ua agia i le ea, e i ai le avetaavale a le Minisita, a outou lea e alala mai o lea e \$34,000 lona totogi. Ua leai se isi o le atunuu lenei e le fai mai ia te au. Ua ou ma, aisea? Sa ou amata i le \$11,000 faatoa ou ulufale i le Malo, a o ai lenei ua \$34,00. Se i faamanino le mea lea, leaga o lea e faafofoga le atunuu e ona le tupe, e ona le afu, o lea tatou te omai e lufilufi, lufilufi limalelei.

Lau Afioga i le Minisita, toe tasi lava le mea mulimuli lea e fia avatu. E tauala atu se lagona leaga sa ou faigaluega i le Malo e 26 tausaga. E tele lava ina ou tu i le NPF, e 2 lava vaiaso, tu i le laina a le NPF i le entitle. O le tatalo i lau Afioga i le Minisita e tauala atu i lenei usugafono, toe faamatu se isi 8% mo tagata fai saofaga a le NPF, ave uma le 8% ma tagata. Afai e tele outou loto, faa-10. Faafetai mo le Tala o le tupe.

O le upu mulimuli, ou te fia faamauina le agaga faafetai ma le faamalo i tamafanau a lenei itumalo o Vaisigano Nu 1, o lo o faapea ona saofafai mai i le saofaiga a Ofisa Sili Lagolago. Ua malo le galulue, ia faamanatu pea ia te outou, e lelei le Alii.

Lau Afioga i le Fofoga Fetalai, matou te ta le lave ma leu le iuofe a tautai o le mafuataulafo, e avatu ai vaimalu i puega. I le fita faafofoga a lau Afioga i le Palemia ma le aiga Kapeneta, ma sui mamalu o le Fonousu a Samoa, ae tainane le tapuaiga mamala i le vaa folau o le Talalelei. O Tama ma Aiga le Usoga a Pule ma Tumua, Ituau ma Alataua, Aiga i le tai ma le Vaa o Fonoti, faamagalo se upu ua lagavale, pe taulaulu i la outou faafofoga.

O le lasi fautuaga mai le usugafono a lenei itumalo, lau Afioga i le Taitai o le Malo ma lau Kapeneta, lau Afioga i le Fofoga Fetalai o le Maota ma le Palemene. E tatou te fiu e faamalie le tagata, e toe fia inu foi taeao, e toe fia taumafa foi, ae faamalie muamua le Atua ona manuia lea o le Nofoaiga ma le atunuu. O upu lava a le aufaitofa o le atunuu e leai se faiva e leai se lafoai. E ui lava ina potu le tautai e pisi lava le sami. Ia faamagalo ni lape ma faatea ni iliilimamate, ae tatou seu i le Atua e magalo ai mea uma. E faatai la ma le leo o le auauna, faamatafi e le Atua lo tatou aso. Soifua ma ia manuia.

Na faaalua le agaga fiafia o le Maota i le patipati o latou aao i le maea ai o le Saunoaga Faa-Taupou a le sui usufono mo Vaisigano Nu 1.

FOFOGA FETALAI: Malo faafetai saunoa i lau Afioga i le sui mamalu mai Vaisigano Nu 1. E talitonu foi o oe le isi sui sinia sa galue i Matagaluega a lo tatou Malo. E talitonu foi ua tele foi lou sao i le aiga Kapeneta, aua lava le lufilufiina o le tamaaoiga aua se lumanai manuia o lo tatou atunuu. Ia faamalo faafetai, malo sausaunoa. Ua faafofoga foi lou itumalo, aua foi lou finagalo faaalua aua lava se lumanai manuia o lou itumalo, aemaise foi o lea ua e taua se sui faipule faapitoa o Asau, malo faafetai. O lea foi ua aofia mai ai ma Safotulafai, ia malo faafetai, toe toalua (2) lava Savaii lea e le i ai ni latou sui faapitoa. E faafetai mo le laga o lea mataupu, malo lava tapena malo lauga.

O le taimi lenei ua maua foi le avanoa o le tatou Maota, i se sui usufono e fia saunoa i le tatou Tala o le tupe. E matau atu o lea ua folifoli mai le sa o Palauli.

Tulai maia lau tofa i le tuua, aua le sui usufono mo Palauli 3, ma le faaaloalo.

SAUNOAGA FAA-TAUPOU

Tofa LAGAAIA TIATUAU TUFUGA (Palauli 3): Faafetai i lau Afioga i le Fofoga Fetalai mo le avanoa.

A o le i osofia le maanunua nai le faogagana, ou te muai ta le pola i vao ma autala le gagana, aua lau faafogafoga tapuai Samoa. Ina ne i lape se tala a o se gagana, ona avea lea ma le tonu i lou tagata. Ae afai foi e sala, o se tualogo ae o se lauseoso. Ona ou matau lea, ia tapuai maia, ae o le a fagatailia ia le tai o Lusi, aua o le tai sa faagaga ae faatoetoe i le lagi. A fai e oo ina tetele, ua tatau, e oo lava ina maualuluga. Ae o lo o solomaomao le lupe a le teine o Sinatapuola, pe lele ae pe mau i fea. Fai mai e lilifa i malae o le vevesi, o i ina o momoli i ai le alofa ma le filemu o le Atua. E lelepa i malae o le totoa, o i ina o momoli i ai faamanuiaga a le Atua i aso fai pea ma lona filemu. Ona talitonu lea o lou faamoemoe, e le toe tausufia le alasiae o le tutafaitoa. Pe toe tau faaoleoleina toega o le malama, seia lafo i le taulaumea. Leaga o galuega mamana ia o le alofa tunoa o le Silisili Ese, e salui ai le soifua ma le ola. A, leitioa a pese lua Ga, leaga a patilua Ga ona pese lea o Talava.

O lagona o le fiafia, a saasaa Tapui ona aiaili lea o Siuolagi, e mafua i se a? Aua foi ua tofailagotai le faamoemoe ua leva ona lavasi i ai. Sa faamemelo i ai, ae sa matematelima i ai faiva o Pausisi pe taunuu ae pe tua ma ni a. Ua a nei le aso? A, ua tago i ula ua tepa i ula, ua tatou fuifui taugalu ina ia ua muao tinio, ua fiti ua tini le faiva o Tapalega, e i ai le aso ma le Maota lenei. Ailao ua maua le faia o Tau, ua atulugalomaloma le fiafia, a o lele ua suasua le failagi. Ae savini faafuluomanu ai lagona, aua o lea ua faatalimaua le atu a le tautai. O le leva ia ona tatou taumafai mai, ua leva, ae tasi lava le faamoemoe, tuu i le Atua, o Ia na te faasoaso lo tatou

faamoemoe ma o tatou manao ma o tatou tuinanau i aso uma. A lea ua tali le Atua. Ua tali le Atua ina ua fuli le vaa o manu, fao le vaa o mala. E ui ina o tatou saaimaomalie, ae eva i lagitau. E mulia ona lililo ae inu i le vai, o lea ua tatou laulua fesilafia i magafetau o le soifua i le avafatafata, i le fofoga ava, i laufofoga o le fiafia ua tatou saafi ai, ona o le Atua ma lona alofa faasoa.

O le tele ia o upu e tatau ona sufi ai le Atua ma Lona agalelei. Ae leaga o le Atua o Ia o le alofa ma le alofa fua. O le Atua o le moli e mu ao, e saili manu i ai le lalolagi i Lona matagofie ma Lona pupula. A o le galu e faasufiata e toa i ai le auaumalu pe a mavae matagivale. O le ala lea o le alaga o le tagata ua faauuina ae mamananu i le lafolua a le poto. Ona alaga ae lea, A! le Atua ua malieo ua maliepule. Aua ua e faia mea silisili ua saafi ai lau fanau. Faafetai i Lou filemu, faafetai i Lou agalelei, sa o matou talia lava Lau faasoa, ua tali faaaliali Lau Afio i lenei aso. O lea ua faatutu foe o le savili ua sauni le foe afolau, o lea ua folau le sa o Samoa. Ia taiala oe, ia fesoasoani mai i le vaivai o lau fanau. O lau faitau foi lea, o le aso, se ua le maugagana Palauli i le alofa o le Atua ma Lana faasoa. O le muaau o le matila, ae lago i magamate e pei o le upu i le gataifale. Ua le limu foi ae ua tatoga a ua falelologo le Maota ma le taeao lenei ma le aso. Ua mafua i se a? e le uma lava le alofa faifaiepa o le Atua.

Ona ou talitonu lea, a saalulululu le matagi, ona ou faasau lea i ona fune tulaueleele ma ou faapea ane, tulou Samoa. Aua lau faafogafoga ma lau tapuai i lenei aso ma le faamoemoe o lau Palemene Samoa. Talofa, Samoa o ou paia e le popo, leaga o oe o le maaveave faalanugata. E le se niu aleale, ona ou faitau lea, ou te le tatuaomalo, pe ou te tapueimuliomalo. Ou te le matau laulautasi pe ou te faitau i le vaitaulua e pei o le fetalaiga i le vaatele. Ae i ai foi le mau ou te faitau i ai, pe e te ai te tu pe te ai te nofo, e le aveesea mamalu o Samoa. A fai foi e faitau e tautala i paia o sa ma faiga o Samoa, ma ou faapea ane, mai lava i le Matafanua seia paia Siuolefanua, po o le tolotolo na foufou e sele ai le la, seia paia Siuolefanua o le vai na sasali.

Samoa, talitonuga o Palauli o lea ua taoto paia ia ma sa i totonu o le Maota lenei, a o le malae i Tiafau, leaga o le malae o le faautugatagi a Samoa. Na utu ai le totomasaa, ae fafau ai titi aua se lumanai o Samoa mo a taeao ma sona malo saoloto. Ua tini le faamoemoe o tuua ua lagomau mai tiasa. A o le malae foi lea na to ai le ie o Tumua ma Pule, e i ai ona fesootai ua fealofani ai Samoa. Ua fealofani ma fesilafai ai aiga ma nuu, o paega ma alalafaga, ae soatauau ai Samoa ma atunuu o le lalolagi. Ina ua gase taua, ae tu le Malo o le Atua i totonu o le Maota lenei ma le malae lenei i Tiafau, lea e taoto ai sa ma faiga o Samoa. Na ou faitau foi lea, ou te le toe tauauuina pe toe paopaoina fuasou o le tai lagalaga, leaga e leai lava se tautai na te toe sosofa le faala o taiao. E leaga e tupu le tai, e tupu foi le vai, ae tumau lava paia o Samoa e faavavau lava. O le faitau lea, o le manatu lea, o saafi foi ia. Samoa faafetai i lau tapuaiga, ona ou faitau lea, o le a matua ia le tuu i le vai avea

ma le lautileputea i vaifanua o le vimoto. Aua o Tumua ma Pule, Ituau ma Alataua, Aiga i le Tai ma le Vaa o Fonoti. Ae tainane foi le mamalu ia te oe Sua ma Vaifanua, o Fofu ma Itulagi, tootoo o le Faleula ma tama o le Manuatele, ua malo tapuai.

Samoa, ala mai laia. E le o se Faigamalo a se pati le aso, e leai. O o le Faigamalo a Samoa o lena e i ou lima, ua i ou aao le pule, o le matou tiute e o mai e matou te taitai ma faatonutonu ma tapena mea uma mo oe Samoa mo sou lumanai. Ua uma la ona faufau lo tatou Malo, o nei ua alo atu le tatou vaega, lou aiga, o oe, o lou nuu o lau ekalesia ma lou atunuu. O mea ia ua tapena, ma le faamoemoe e te lagolago. E manaomia lau tuualalo Samoa. E matou te le o mai e saili ni fuluula e pale ai matou nei, e leai o oe Samoa ua e tofi matou, matou te o mai i le Maota lea, e tapena mea mo Samoa mo a taeao. E le saili so matou lelei Samoa, leai, o le alofa e moni, o sou saolotoga ma sou fiafiaga mo a taeao. Ia Samoa o se tala lea.

Ona i ai lea o le manatu leaga ua tataua ona pasi le Tala o le tupe e tau faapuupu ai le lauga. E leaga o lea e soona avavau le aualii lea i mea e faatino e mananao ai, ae po o fea le mea e aumai e fai ai, e le o taitai lava le faasoa a le Minisita o Tupe. Ae faafetai Minisita, o le tali masani lava, tuu maia, lafo mai, o le tali filemu e liliueseina ai le ita. Ae aua la ne i outou faia le tali lena ia Palauli.

Se i ou talanoa atu i le Tala o le Tupe. E fai le Tala o le Tupe, ae maligi lava ou loimata, ioe, ua tau alu atu ai ma lou mafaufau i lau Afioga i le Minisita o Tupe. O le manaia ia o lau folasaga, faafetai malo tapena. Ae ou te le o fiafia i le isi vaega e le o taitai lava.

A silasila i le faatinoga o mea ia, ua tofu uma lava, a pau tupe, pei la o le Afioga i le Minisita o Pisinisi ma Alamanuia, o le \$31 miliona e tataua ona ave i o, ona tau feololo lea o le faasoa. Ae leaga o le a le mea o le a e faasoa e le taitai ona feauautai? E le o toe mamao foi le isi lua (2) tausaga, ae faafetai. O lea ou te tilotilo i le \$10 miliona mo pisinisi laiti, ou te fia fesili, po o ai e agavaa i ai mea ia, ae pe faapefea foi ona tufa ma faasoasoa le \$10 miliona lea. E ala ona ou talanoa i le mea lea, e le o lelei le aumaiga, po o ai e faasoasoina ae faapefea ona fai le faasoa lea. Aua e seasea ou faalogo i mea ia e aafia ai Savaii, e na o iinei lava ae matamata Savaii. Ioe, o le mea lea ou te fia talanoa atu ai i le mea lea, se i alofa tautuana. A ou tilotilo i taumafai a Savaii, talofa e, taumafai ia, o nai fale la ua amata. Ae a umi ona matala, e lua (2) lava vaiaso alu atu la ua toe faalava mai ai le laupapa. E mafua i se a? Aua foi a o mai nai tagata e taumafai se loan e taumafai ai nai pisinisi ma fesoasoani. A fai atu i se \$5,000 ae fai mai, a uma lau \$2,000 lea ona toe sau foi lea. O le a le mea e maua i le \$2,000 lea? E leai se mea, ae a o atu la le aumatutua ia, e avane i ai le tai fia miliona. A faapefea ona atinae aiga. Faafetai mo le faasoa lea na ou faalogo ai, lea pe \$400,000 ea mo le faasoasoina...lea e lavea ai le \$10 miliona. Ae ona pau lava lena o le mea na ou fia fesili atu ai faamolemole, ae faafetai mo lau faasoa.

O le isi vaega, o le \$5 miliona mo faleapitaga o turisi, ou te fesili, aua o lea sa faapea e lavea ai, pe lavea ai la ma beach fale. Ae pe faapefea foi la ona fai le faasoia i le mea lea. O o i lou itumalo, e tasi lava le mea e faamoemoe i ai le taaloga o faaseega. O la foi sa fai ai i o le taaloga o le vasa Pasefika, i ina i Aganoa, pe oo i ai le faasoia i le mea lea.

O lea e faafofoga foi le Minisita o Galuega, o le matua leaga lava o le auala. A o lea ou te tatalo ua tatau ona faalelei le auala lea, o le fiafia ia o turisi i le mea lea. O mea lava ia o faaseega, e autovaa atu i ai turisi, e fiafia foi e nonofo ai leaga e manaia ia o le ea ma le savili. E faalogologo i le talatalanoaga a galu, ma matamata i ia foi ia e o i luga o i lalo, o le manaia ia, ae leai lava ma se mea o maua ai. Ae ua tatau ona fai le auala lea. E tatalo atu, o la e faafofoga mai le Afioga i le Minisita o Galuega, fai le auala. E toe tatalo atu, ia lavea ai la ma le mea lea. E le aveia la i o i le beach fale lea, ae aumai ia te au. E leaga o au e ana le lisi o au e ana le fanua.

O le isi mea o Vaitoomuli, aua o lou itumalo e tofu ma mataaga. O le pitonuu lea o Vaitoomuli, o lo o i ai fetumaa, e tetele masalo e aafia le mea lenei. O le manaia foi ia o lea mataaga o fetumaa. E tatau la ona lavea i le mea lea, o la e o nai toeiina e nofonofo ai ma vaavaai. Ai lava o maua ai ni a latou manuti, ae e manaomia le fai lelei ina ia fiafia i ai turisi e o i ai. E le na o turisi foi a o tagata uma lava o tatou e fia o se i tilotilo i mea ia o fetumaa pe faamaonia. E tele foi la le fia o ae leaga auala. Lau Afioga i le Minisita o Galuega faamolemole, ua tatau lava. E o uma lava mea ia e 2, ioe. O auala ina ia oo i ai.

O Vailoa, o le manaia foi ia o le mea la e i ai leaga o le afu, e fai ai taelega, o le fiafia ia o tagata e ese le manaia o le mea. E leaga foi le auala. A o sina seleni pe aafia i i le mea lea se i faalelei ai mea ia. E tusa e taofi ai foi le ai e toeiina o tupe ae fesoasoani ia lelei ai le mea lea. O le mea foi lea o lea e taua i le tai \$1 miliona lea, e tufa afea? O lea ua amata ona tapenapena, fai Komiti, talatalanoa ma faasoia i se mea e tupu ai le mea lea ina ia aafia uma le tele o aiga e vaivai. Faafetai, e matua lagona lou fiafia i le vaega lea i le tai \$1 miliona lea. Faafetai i le tofa i lau Afioga i le Palemia ma la outou Vaega, aua o outou ia o le Malo a o matou lea e agaia outou. A outou faaletonu lava o le a safue atu lava outou pe a, ioe. O mea ia o lea ou te talanoa i mea ia, aemaise o auala galue. Ua fia o e gagau le vao, ae o le matuai malepelepe o auala ma mea la e i ai. Lau Afioga i le Minisita faamolemole se i e afio atu lava se i asia le tele o atinae la e i ai. O lafumanu, o faatoaga, o le matuai manaia. Lelei foi le vao, a o le mea lea e tupu, ua matuai leaga o auala, e tatalo atu ai. Masalo po ua maua le 20 ma ona tupu o nofoaiga ae leai lava ni auala o faia, o le mea lava lea la e i ai. O le mea lea e tatalo atu ai ma le faaaloalo.

O le isi vaega lau Afioga i le Minisita o Galuega, o le vai o Palauli. O le mea la e i ai ua sau lava le vai alu agai i o i isi itumalo ae oti ai Palauli e ona le vai, toe tatipi ai ma vai o lenei itumalo. A o le taulaga, o le meaalofo, o le

foai fua lea a le Atua ia Palauli leaga e amiotonu uma le itumalo lea e mafua ai ona maua le vai lea. A o le mea lea ua tupu, ia o lea ua sue ai tou mea i o i le vai o Palauli. O le mea lea e tatalo atu ai, a le tuua i lalo, ou te le toe manao e fai ni mita i o. A le talia le tatalo ua avatu, e tipi mole lava e Palauli le vai le la. Ia fesoaoani mai. O lea foi na tau faatu le afi i o ona o le vai e lelei le vai. Ia, ua matuai sa sa ona toe vaai ni mea faapea i totonu o eleele o Palauli. O le a fai fai lava ona oo lea ina faaletonu ai le meaalofa a le Atua. Ia, o nai mea ia e tatalo atu ai, faamolemole ia outou alofagia le faamoemoe.

O lau tilotilo i le falemai la e i Tuasivi ua faasolo foi ina lelei. A o le mea lea e tupu, na ona avatu lava o le ma'i uma. Ioe. O le a le mea ua tupu ai lea mea o le avatu uma? A tuai ona kili mai iinei i Motootua, ua leai lava. E mafua, e le o lava meafaigaluega, le lava meafaigaluega.

Lua, o fomai. E le avatua ni mea faataitai i o i Salafai, aua, o Salafai e faatuina le Malo o le Malo o Salafai e fai mea mafai ae avatu tou mea e faataitai i o? Faamolemole lau Afioga i le Minisita, se i silasila totoa ane i le mea lea. O la ua fai le falemai i Palauli ma Satupaitea ma Palauli le Falefa. Toeitiiti lava manaia faamolemole lau Afioga. Toeitiiti lava manaia le falemai. Ma le tatalo, ua tataua ona nofo ai se fomai. Aua o le mea la e i ai, a avatu lava le mai i ina e faaletonu, ia toe o i Tuasivi. A aumai i Tuasivi e faaletonu lava toe fai mai, ia, o le alofa o le Atua e ola ai le mai. Ae a sau lava ua uma mai le auala, ia o lena lava. O le mea lea e tatalo atu ai faamolemole, se i tautuana lau Afioga.

FOFOGA FETALAI: Ia na o se fautuaga a le Nofoa i le saunoaga a le sui usufono mamalu, e leai se isi e faalavelave, ae ia tatou liolio foi i a tatou saunoaga ona e tataua ona i ai ni mau e faamau ai ia tulaga. E fesoasoani atu foi le Nofoa, ia tatou taumamao ma ni faaupuga e ono masalomia ma afaina ai tiute ma galuega a le Malo. Pau lava o lea, ia e manaomia mau e faamaonia ai ia tulaga, ae ia faalautele pea le saunoaga ma ia aloaloese i tulaga faapena. Ma le agaga faaaloalo.

Afioga LAGAAIA TIATUAU TUFUGA: Faafetai i lau Afioga. E pei e manaia foi le gagana tuusao e faigofie ai ona avatu, ae ui i lea o le a usitai i lau Afioga.

Lau Afioga i le Minisita o Galuega e ui atu i lau Afioga i le Fofoga Fetalai, o le malae vaalele lea e fai i o, o fea le igoa o le mea, i Tiavea faamolemole, tuu le malae vaalele lea aua le faia. Na o mea alu lava mea la e fai i o. O ai e alu mamao i o i Tiavea ae faapefea le malae vaalele lea i i i Faleolo? Ae faapefea le malae vaalele manaia lava lea e i i i Fagalii? O le tatalo, toe faaoga le malae vaalele lea e i i i Fagalii, o le faigofie ia ma latalata, a o le tuli o Tiavea, e fano ai ma le soifua o le tagata i le mamao. O lea e tatalo atu ai, taatia le malae vaalele lea aua ne i faia.

O le uafu lea e taua i Asau, ia lena foi ua silasila i ai, ua uma ituaiga mea e tui ai le mea le la e le ila le papa i o. O lona uiga, e folo foi e le uafu le la le faamoemoe o tatou. Ae taatia na uafu. Fai ia lelei Salelologa o lea e tatou te o faatasi i ai. Ae le o le omai i Salelologa ae toe o i Asau e mamao. E tutusa lava la le mea le la ma le mea lea e i i i Tiavea. A o le tatalo, tuu na mea, aua le faia ma le alu ai o tupe.

O le isi mea ou te fia talanoa i ai leaga o lea e pei o totogi o nai tagata faigaluega. O i i vaa nei e feoi nei, e totogi lava i o nai kapeteni ma nai seila ae leai ni alauni, ioe. Ou te alofa i ai, e o oo i le Aso Sa e tatau ona malolo, a o lenei lava e feoi atu a o le leaga ia o totogi. A o le mea foi la e tatau ona fai tipi le Aso Sa. O le Aso Sa e malolo ai ma tapuai i le Atua, malolo vaa ae se i o nai kapeteni ma le aufaigaluega e o i lotu. Ia tasi lea vaega e fia momoli atu. Ma le faaaloalo lava.

Ou te fia tautala i lau Afioga e ala atu i lau Afioga i le Fofoga Fetalai i le Minisita o Pisinisi, Alamanuia ma Leipa. E i ai le aso na ma faatalofa ai ma lau Minisita. Na ma faatalofa ae ou tago atu, ua matuai maluluina lava aao o le Minisita, pei ua tau afu malulu. Ioe. Ua ou alofa la i ai, i le mamafa le avega. Aemaise la ou te iloa, ua mamafa i le Minisita le vaalele. Ioe. Ia, o lea la ou te fia talosaga i ai, a faapea lava na te silafia i le vaalele lea e le tatau ona aumaia, aua, aua le aumaia. Aua o lona uiga, ona aumai lea e tutu i i. Lona uiga e eeva le Pule Sili o le Lotto ma le aufaigaluega e faaputu tupe ae aumai lava ma folo e le vaalele lea, ona aumai lea tutu ai i i, e leai se mea o maua ai, e le tatau. E i ai le taofi, tau tolotole litiiti atu le vaalele, aua ne i aumaia le ta vaalele lau Afioga. Ia pe aumai foi tatou o tatou tafafao ai ma le ta vaega, le taua Matagaluega, o le mea lava e pe ai tiai ai ae tatou omai. Ia onosai. A uma lou 2 tausaga lenei o le a sau, ona e afio mai lea ae ou alu atu e faauma le ta galuega, leaga o mea na e lelei ai tele Palauli o le mea o le fofo gau, ioe. Toe faufau mea ua gaugau. A faifai atu lava e gau lava, ia tatou o pau pa ai lava lea faapea.

Ia agalelei mai le Atua. Faafetai i lau Afioga i le Minisita o Faatoaga, e ui lava ina le afea ou tuamaota ma tualaoa o le matou nuu, ae faafetai ua ou vaai ua faatino le galuega. A o lea ua ou talanoa, o le vao lea o Palauli, o le matua lelei lava so o se ituaiga mea, ae tasi lava lona, e le o lelei auala. O lea e tatalo atu ai ma le faaaloalo, se i tautuana se i faamuamua atu lava tatou polokalame i Palauli, aua le sopoloa ae le faia mea ia ou te talanoa ai i Palauli. Ioe. O le mea lea alofa mai ma fesoasoani mai.

O nisi, lea o le a avatu lau Afioga i le Minisita mo Faamasinoga. Ia o lea o le a ou tatalo mo oe, leaga e leai sou ama a o lea o le a ou tatalo mo oe ia tautuana ma oe le faamoemoe o tatou Faamasinoga. O a ni faafitauli, ia i ai le agalelei o le Alii ma fesoasoani atu.

Lau Afioga i le Fofoga Fetalai, ou te toe fia foi lava i tua sau tala faamolemole, ona o le aso ananafi, o au na matuai lagona lou faanoanoa i le aso ananafi. Ua aafia Ekalesia, ua aafia. O le tatalo i Ekalesia, aua, aua tou

te lote le polokiki, tuu le polokiki i e o lo o feagai ma le polokiki, fai la outou tiute o le tatalo, la outou nonogamanu, la outou faatagitagi timu ma le nonofo a foemuli, tatalo i le Atua mo se manuia o Samoa ma le filemu o Samoa. A o mea ia na faatino ananafi, oi ou te ofo i le le alolofa. A o le fesili? ua fano se soifua ua le mau ai le malali? Ua fano? Leai. A o le a se aga ua sese ai le Faatuatua i le Atua Samoa ua Tasi? O lea lava e toa lava. Aisea? O le filemu mo Samoa. A o le mea lea ua tupu, ua oooo lava i mea e gata ai vesiga a Samoa.

FOFOGA FETALAI: Ia, na o se fesoasoani i le sui usufono mamalu, e talitonu foi o lea ua oooo lau saunoaga i le tulaga lea o lea ua maea ona fai i ai le faaiuga a le Nofoa. E manatu foi ia tatou tausii pea le mamalu o le tatou Palemene, o lea ua maea ona oo i ai le faaiuga a le tatou Nofoa, o lea foi ua faafofoga Samoa. E i ai foi le manatu o le a tatou le toe oo i ia tulaga. Ae manatu o oe o le Matua, faaiu maia lau saunoaga.

Afioga LAGAAIA TIATUAU TUFUGA: Faafetai i lau Afioga. E galutuu lava le faamoemoe e usitai foi i lau Afioga. Avea ia lea avanoa ou te faatalofa feiloai i lou itumalo. Talofa Palauli, aua le afifio o le Faasisina ma le Aloalii, le afio o le Fofoga o Sa Lilomaiava, alaalatai Saoletaulua faapea foi Toluono ma le aiga Falelima, alaalatai le nofoalii ma le Matua ma le mamalu ia te oe le Faleao.

Afifio lou outou Aiga Sa Leituala ma la outou Tama, susu le Faasisina e faapea foi Leavaiseeta. Ia, afio le alo o le Lilomaiava faapea foi Vaovasamanaia, alaalatai ia oulua Tulafale Alii Fiso ma Seumanufagai, faapea foi Moa ma Lafao.

Ia, si ou nuu pele Faala, aua le afio o lau Afioga i le alo o le Lilomaiava, lau Afioga Iaulualo. Susu Suafa aua Lauulu ma lo latou Aiga Sa Lauulu ma le Matua ia Tauao, Fuiavaiiili ma le Aloalii, alaalatai lau fetalai i le Saofetalai Lagaia ma Lagaia ma lo outou aiga Sa Lagaia. Ia mamalu ia oulua le uso taua ia Tui ma Tapusoa ma le tino o Manusina aemaise lava le paia i auauna a le Atua aua la outou faatagitagitu ma le nofo a foemuli, o la outou sailigamalo, o la outou taulaga ma la outou tatalo i aso faipea aua le faamoemoe o Samoa. O lea ua tu, ua ae malo, ua ae manuia. E mafua i se a? O la outou moliga talosaga lea, o la outou tuualalo lea i le paia i le aufaigaluega a le Atua.

Faafetai mo la outou taulaga, faafetai tatalo. Palauli, faafetai i lo outou agalelei, faafetai i lo outou sailimalo. Leaga o le mea lava lea sa i ai le manatu ma le faanaunau, ae sa taumate i le ete pe tua ma ni a. Peitai, o la outou tofa paia lea ma la outou faautaga oo ua outou tusilima ai ia te au nei ou te sau e ave aua ma outou fofoga e faaleo outou finagalo i totonu o le Palemene o Samoa. Ua ou talia, ua ou usitai. Ma o le a sou vaivai, ou te taumafai i le mea e gata ai se iloa. O le a foi sa outou faafogafoga e le tonu,

e le tau, o le tatalo lena, se tualogo ma le lauoseoso, a ia fesoaoani mai le Atua. La outou tapuaiga ma la outou faamanuiaga ua mafua ai ona tele lou loto, ma ou te naunau e fai mea lelei ma mea sili aua la outou tapuaiga Palauli. Ia o le agaga fiafia lea ma le faafetai. E i ai se aso o se taimi tatou feiloai, se i tau fai se loan se i tau fai atu ai lota oo o lea e faaletonu le tamaoaiga i lenei taimi. Ia agalelei mai le Atua.

Lau Afioga i le Palemia, malo le onosai, ia taumua lelei lou sa, ma ia talimatagi le la afa aua fatioo ua tauleoo a ia agalelei le Atua faapaia lau tofa, fesoasoani atu. Ma le tatalo ia taumualasi ma ia i ai le vaa ia tumau ai lau faautaga ma le tofa i lau Afioga. Agalelei le Atua. Le paia i le tatou Kapeneta, ia agalelei le Atua ma ana faamanuiaga. Le tatou aofia i totonu o le Maota, aua Ofisa Sili o Pulega o Matagaluega, o outou mama na. E leai lava se naunau ina ia tatou eseese, e tasi lava le faanaunauga, ia tatou galulue faatasi pe a moni le alofa i le tatou atunuu. E taga lava lou faamatatasi foi lele ae fai faalelei a tatou mea.

Ia agalelei mai le Atua. Faamanuia le Atua i lau Afioga i le Fofoga Fetalai, foi le tofa paia i lau Afioga. Maua lou lototele aua le taitaiga o le Palemene a Samoa. Soifua ma ia manuia.

Na faaalua le agaga fiafia o le Maota i le patipati o latou aao i le maea ai o le Saunoaga Faa-Taupou a le sui usufono mo Palauli 3.

FOFOGA FETALAI: Malo faafetai saunoa Palauli. Ia leaga e faigata o oe o le Matua Fetalai. Lea lava ua oooo i ooooga o le vagana fetalai, ua faafofoga foi le Maota aemaise foi o Samoa atoa ma lou itumalo, o lea foi ua oooo foi lou finagalo faaalua aua mea e fia faalelei o le itumalo. E le gata o le itumalo, ae ua aafia ai foi ma le tatou motu i Savaii. O le mea lea faafetai tele, faafetai ia te oe le tama matua. Le tatou itumalo ma Palauli, malo faafetai mo le tofa.

E matau atu o lea ua tatou taunuu mai i le tatou malologa masani. Atonu e fotuai ma sauniuni mai se isi tatou sui usufono e tatala ai foi le tatou fonotaga pe a toe foi mai le tatou malologa.

O lenei taimi, e faasilasila atu o le a faataatiaese Galuega a le Maota mo lana malologa masani.

Na faataatiaese Taulumaga a le Fono Aoaio Faitulafono mo lana malologa masani i le itula e 11:00 i le taeao ma toe faaauau i le itula e 12:00 i le aoauli.

Na toe faaauau felafolafoaiga i luga o le Tulafono Tau Faaofi o le Tala Faatatau Autu o Tupe 2021/2022.

FOFOGA FETALAI: E faasilasila atu ua toe amatalia nei Taulumaga a le Fono Aoaofa Fautulafono.

Ia, e ao foi ona faailoa atu i le paia o le Maota le faaaliga foi lea sa tuuina atu i le taeao ua sola, e ao foi ona silafia e le Maota taulumaga uma e pei ona tuuina atu i le mamalu o le Faamasinoga. Ma o lea ua logoina mai le Nofoa o nei i le itula e 2 i le aoauli nei o le a tolaulau ai ma faatino ai folasaga a le Faamasinoga ma taunuu ai i se taunuuga filemu, ina ia silafia foi e le paia o le Maota ma le faafogafoga mai a le atunuu, o lea lava ua tuuina atu i le Faamasinoga mamalu mo sana faaiuga i lenei mataupu e tulai mai, i le faaiuga lava lea i le faatautaina. A o le tulaga lava ia i sui usufono mamalu o sui usufono filifilia, e le o oo i ai se tulaga a le Fofoga Fetalai ma le Maota. Ae pau lava lea o le latou faatautoga o lea ua tuuina atu i le Faamasinoga ma o lo o faia i ai se iloiloga ma se faaiuga a le Faamasinoga nei i le aoauli. Ia ma le agaga faaaloalo mo le silafia e le tatou Maota.

E i ai le talitonuga ua matu i fau le tauteaga ma le taligasua i le paia o le Palemene aua se faasiliga malosi e faaauau ai le tatou galuega. Faamalo faafetai le onosai. A o lenei taimi ou te tapa ma le faaaloalo lau Afioga i le Tamaitai Palemia mo le lafo.

LAFO MO LE SUIA O ITULA FONO

Afioga Hon FIAME NAOMI MATAAFA: Lau Afioga i le Fofoga Fetalai, ou te tulai ma le faaaloalo e faatu le lafo mo le suia o tatou itula Fono a o faagasolo ai le talanoaina o le Tala Autu o le Tupe e afua atu nei e faapea: *O le a faaauau le tatou felafolafoaiga seia aulia le itula e 1:00 i le aoauli nei ona tatou malolo ai lea ae toe faaauau i le itula e 2:00 i le aoauli seia aulia le itula e 6:00 i le afiafi, ona faaauau ai lea i aso o totoe seia maea le faitauga faatolu o le Tulafono Tau Faaofi o le Faatatauina o Tupe 2021/2022.*

Ma le faaaloalo lava i lau Afioga.

Faaluaina e le Sui Palemia ma le Minisita o Faatoaga.

Na faamaonia le lafo.

FOFOGA FETALAI: Ia, o lea ua faamaonia le lafo ma o le a faaauau le tatou galuega seia aulia le itula e 1:00 i le aoauli ona tatou malolo lea ma toe faaauau i le itula e 2:00 i le aoauli seia aulia le itula e 6:00 i le afiafi. Malo faafetai.

Tatou te malolo ua maea ona saunoa le sui usufono mai le itumalo palota o Palauli Nu. 3. Ou te talitonu o le avanoa lenei ou te tapa ai ma le faaaloalo

se isi sui usufono mamalu e sausaunoa i le tatou Tala o le Tupe. Ma le agaga faaloalo.

Ia, o lea ua matau atu o lea ua see mai le sa, o le tama matua foi ua leva i totonu o le Maota o Samoa, o le Afioga ia Tea ua taua lou suafa, Tooala Peato, ia o le sui usufono filifilia mai Faasaleleaga Nu.4.

Ia o le avanoa lenei mo le saunoaga a le tama matua lau Afioga i le sui usufono mamalu.

SAUNOAGA FAA-TAUPOU

Afioga TEA TOOALA PEATO (Faasaleleaga 4): E momoli atu le agaga o le faafetai tele i lau Afioga i le Fofoga Fetalai. A o lenei itula ua ou tulai atu ma le agaga faaloalo e tau molimoli atu foi se sao o lenei itumalo aua le Tala Faatatau o le Tupe ua folasia nei i le Laulau a Fono a le palemene. Lau Afioga i le Fofoga Fetalai, sa i ai lava lou mafaufau o le a ou le lauga i lenei Fonotaga. Talu lava ona ou oo mai i lenei Maota, o le lona 4 lenei o Paeaiga, ua ta lelava tu atu i le itu lenei, na ota sau lava o ota opasisi a o lenei lava e opasisi. O le mea lenei ua ou augata ai e lauga. Ona ou faapea lea, ia, tau ia ina ne i faapea mai po o le a le mafuaaga ua ou le tulai atu ai. Ae o le a ou le lauga se i vaeane lau Afioga i le Fofoga Fetalai, ae o le a ou taumafai ou te talanoa atu. Ioe. O lau talanoa la, ou te talanoa i le tulaga o lenei Paeaiga ua tatou faatasi ai, ua tatou aulia mai.

E maoae foi le tulai mai o lenei foi Paeaiga i lau lava lea... sa ou i ai i le Palemene i le 1982 na ou ulufale mai ai, ona ou toe tulai mai lea i le 1985, lea sa ma faatasi ai ma le Sao Faapito le Afioga ia Fiamē Naomi Mataafa, seia oo i le 1988, ona ou faaseetuagalu ai lea. Ona ou toe ulufale mai lea i le Palemene i le tausaga e 1996 a ua 5 lenei o tausaga o paeaiga ua le 3 seia oo mai i le 2001 ia ona muta ai lea o lou taimi. Ou te le i manatu la ou te toe oo mai, aua foi ua ou matua. Aepeitai ane, ua toe filifilia mai au e lou itumalo. I le 2021, ua 20 ai nei tausaga talu ai. O le ala lea o lou fai atu, o au nei ua le iloa lauga. Sa ou iloa lauga i le vaitaimi lenei, ae ua na o lou iloa talanoa, se i tulou lau afioga ma le mamalu o le Palemene. O lau talanoa la, o le tulaga o le tatou ulufale ma ii lenei Paeaiga ma le filifilia mai o i tatou e le mamalu o le atunuu, o itumalo e 26. O lenei 26, o lo o tumau lava, o lea ua fonu nei le 26 lea. Ona ou manatu lea, o le tatou 26 lenei, na aumai e le atunuu e faatino le Malo ma faatautaia le Malo, o lea la ua tatou i ai nei. O le pine o lau tala, mai le faaiuga o le palota tele, e oo mai lava i lenei itula, e le i maluelue lava le 26 lea. Ona ou manatu lea, ua le gata ina filifilia mai tatou e le atunuu, a o le finagalo lea o le Atua. O le finagalo lea o le Atua e suia le taitaiga o le Malo. A na le finagalo le Atua e suia le taitaiga o le Malo, tatou te le tulai mai. Semeamanu e alu alu foi le tatou numera lenei, e oo foi ina toe soloia nisi, e pei foi ona i ai le la itu. Ioe. E tumau lava le 26. E maea

faamasinoga sa feagai ai ma le faiga palota na uma atu nei, e tumau lava. E le maluelue le 26, ona ou mafaufau ifo lava lea o au, se o le finagalo lea o le Atua. Ma o le tofia mai o lenei 26, e faatino le galuega o le taitaiina o le Malo mo se manuia o le atunuu, o le upu moni lava lena.

O le tatou tulai mai la, lau Afioga i le Palemia, e le o so tatou loto o le finagalo o le Atua. Ua finagalo le Atua e suia le pulega o le Malo. E moni lava lou manatu, o le pine lena o lau tala, e tumau lava lenei 26. Se i faapea ea ua soloia se isi. Ae o le lagona lena i lou nei sui usufono. Ma ou te mafaufau ifo, i le toe aumai lava o lenei toeaina o le matou itumalo, ae ua ou matua. Sa ou fai atu i lau fanau, i le taimi na fevesiai ai e pei ona faasolo mai. O au nei ua ou manatu o le a ou alu ou te faamavae, ua ou lelava le vili mai o le failautusi. Tea o le tatou fono lea, e camp i uta, ae ua ou lelava sau. Ae fai mai lau fanau, se o lea na vili mai le failautusi e fai le feiloaiga. Ona ou fai atu lea, o au ua ou lelava alu, ae o mai e o ae ou nofo. Ae fai mai si au fanau, se ae alofa mai, o lou valaauina. Ona ou mafaufau lea, se a na ou le toe aumaia au e lou itumalo, e le taunuu foi lenei faamoemoe. Ona ou onosai ai lava lea, ou faapea, ai o lou toe valaauina lea. O lea ua ou toe oo mai ai, ae ua fai lava si ou matua.

Lau Afioga e i le Fofoga Fetalai, o lena ua ou talanoa atu, ua mafua foi le faaumiumi o lenei fevesiaiga feeseeseai o finagalo, ona ua le talia e le la itu le taitai lo latou malolo. Ua le talia le tofiga mai i le Atua, ia faaseetuagalu ae suia le pulega o le Malo. Ae ou te faafetai atu i lau Afioga i le Fofoga Fetalai, faafetai atu i le lototele o le Sao Faapito lau Afioga i le Palemia. Se e to lou pulou i le Afioga ia Laauliolemalietoa, e ese le tele o upu ma tala, ae le mafai e tulai mai lava, faafetai Laauli.

Sa fai lau upu, lea o le a ou talanoa atu, aua foi na ou fai atu, ou te le lauga ou te talanoa. Sa fai lau upu i le matou Vaega Faaupufai, Valasi na e afio mai, lau tama lena sa matou faatasi, na fai i ai lau tala. E le mafai ona tatou challenge ina le HRPP, seiloga lava e toe malepe mai i totonu, totonu lava o le HRPP. Ae o le taimi lenei ua matua, ioe, e malosi tele le HRPP. Ua ia i latou le power, ua ia i latou le numera maualuga ua ia i latou le tupe, mea uma lava, ua faatino ai fuafuaga uma ina ia tumau le umia o le power. Ona fai lea o lau tala, seiloga e malepe mai totonu. Sole, o le Nofoaiga lea na tea atu nei, ua matua faateia lava au, i lou faalogo mai i taualumaga o le Maota lenei, ua felautoai le Palemia ma le Laauliolemalietoa. Ona ou manatu loa lea, se sao lava lau valoaga, o i ina na tupu ae ai lou mafaufau, e le tuulafoaina e le Atua lana Faigamalo ma lona atunuu. E leaga e faavae ai i le Atua soifua. O le Nofoaiga na tea atu nei, e leai se Oposisi na o Olo a la le e, se o le toa o lau tama o Olo e matautia. O le Oposisi lea, ioe, a o le Nofoaiga lava lea na malepe loa le HRPP, se na faateia au. Ua faalogo mai Savaii, ua faamavae Laauliolemalietoa, fai faamasinoga, toe tulai mai lava. Na aveese ma le Palemene, toe afio atu toe fai le palota toe tulai mai. Ona ou faapea loa lea, ua moni lou manatu, molimau mai lau tama o Valasi i lau

upu na fai. O le a le mea ua i ai, ua malepe, malepe mai fea, malepe mai totonu. Ma ou te talitonu.

FOFOGA FETALAI: Na o se fautuaga foi ia te oe le tama matua a o folau lou sa, talu ai ona o lea ua taua le Vaega Faaupufai, ae le o i ai nisi i totonu o le Maota e tulai mai e tali mai. E i ai le manatu, i le saunoaga a oe le tama matua, faatea ia mea ua tuanai, ae tatou alo i luma lo tatou sa, aua se manuia o lo tatou atunuu, ma le faaaloalo.

Afioga TEA TOOALA PEATO: Lau Afioga, e pei e aafia le mataupu i le mea lea na tupu ananafi. Ae ui i lea, e pei o lea ou te tau talanoa atu, e malepe, ia lea ua malepe. Ae ese ai le mea lea na tulai mai ananafi. O le faasiliaupule foi lea na fai ananafi, ae ui i lea, leaga sa ou fia oo foi i ai. A outou faafofoga foi i le aumaiga, na o ni vale lava lenei itu. E le mafaufau, leai se va faaaloalo leai se va fealoaloai, a o lea ua taofi mai lou fia talanoa atu i ai. Ae e le o sau lauga o le talanoaga lea na ou fai atu ai. Sa faapea e taga le talanoa ae sa le lauga i ai. Ae ui i lea, se ou te usitai. O au ou te maselasela, ae ia outou malilie, a ou sela, ia onosai mai.

E faafetai i le alofa o le Atua, oka se Tala o le Tupe ina a manaia, se na ou tagi foi. E le na o lau tama lea na tagi i lau lauga. Lau Afioga i le Minisita o Tupe, na ou tagi foi i le manaia o lau lauga toe aulelei. Ioe, se o se Minisita sili lea ona ou alofa i ai. E maeu le manaia o lau saunoaga. Ua tau mai ai i i, le finagalo moni lea o le Atua, ia tulai mai se Faigamalo e faasalafa. E pei lava ona aumai i le anavatau, ia tatou taumafai e ave le fesoasoani e laugatasia ai le atunuu. Ioe ia faasoa lima lelei, faasoa ina ia tutusa, aua le faia le mea lea, o le faapito o Manu ia Tasi. Fai mai ua manuia le tamaoiga, ua lelei le tamaoiga, a o le faasoaina la o le tamaoiga, ua le tutusa. O le ala lea o lou fiafia, ona ua ou matau atu i le tala o le tupe, o lea ua faasalafa. E faafetai i le Palemia ma le Faigamalo ua tulai mai. Ia tatou manatunatu, o le valaauina o le tatou Vaega Faaupufai, ina ia taitaiina le malo o le atunuu. Tatou taumafai i le mea sili ona fai, ma ia lufilufi lima lelei. Ia aua ne i afisia le isi ae toso faatata le isi, aua aua lava a ia laugatasia la tatou faasoa. O lea lava ua ou vaai atu i le Tala o le Tupe, faafetai. Ua aumai maioio le fesoasoani ua faasalafa. E faafetai i le anavatau sa o tatou folafola i le atunuu, o lea ua taunuu nei faatoa tulai mai a o lea ua ou vaai atu ua oo mai le manuia i nisi o vaega. Ua sii le penisiona a tagata matutua, oka se manaia. Ua ave le fesoasoani i e le atoa mafaufau, sii le totogi mo isi, e pei o sui o alii ma tamaitai pulenuu. Ua faapau le tau o le power, faapau le suavai. Ua tele mea ua faapau i le 20%, ioe, e ese lou fiafia ma faafetai i le Atua. Ou te avatu ai le agaga faafetai i le Faigamalo ua tulai mai, o le ala lea na filifilia ai e le Atua ina ia sui, sui loa, ina ia maua se faamama avega. O lea ua maua ua pau le pasese o vaa, faafetai ma le anoanoai o isi fesoasoani ua le mafai ona ou faalauina atu. E faafetai i le tulai mai o lau Afioga i le Minisita o Tupe ma

lou soa i le faasoasoina, faafetai tele lava. E faafetai, aua a le taumafai e faatino a tatou folafolaga sa fai i le atunuu, ma ua i ai i totonu o le anavatau, e tele foi le faitio mai. Ae ui i lea, e talitonu lava e le tuulafoaina e le Atua la outou faatofalaiga. E le i fausia Roma i se aso e tasi, ioe, a o lea ua amata mea mai, faafetai. Ua tele le faamama avega o lea ua tulai mai.

Se sa ou fia tautala malosi lava i le mea lea na tulai mai, ae ou te usitai i le faatonuga a le Nofoa.

Ae ou te fia talanoa atu la i le Tala o le Tupe, o le a ou le tolaulauina atu ni manaoga o lenei itumalo, leaga ou te alofa o lea faatoa amata mai ona tatou tulai mai i le faasoaina ma le lufilufiina o si tamaoiga o si o tatou atunuu. O le a ou le pei o ou uso ia sa taumafai atu, ae o lou itumalo o la e faafogafoga mai. Lou itumalo pele, o le a faataoto ni o tatou manaoga mo le taimi nei, e le uma le fai aso, se i faamuamua ia isi itumalo ia ua talosaga atu.

Ae na pau lava lau talosaga i le Afioga i le Minisita o le Soifua Maloloina, ia faamuamua lava le soifua o le atunuu. O lou falemai la e i Tuasivi ua matua faaletonu lava le mea e taoto ai e gasegase.

Ma ou te talosaga atu i lau afioga, e te Minisita i Upolu ae ou te Minisita i Savaii. Ioe, e na ona ou avatu i lau afioga mea o lo o manao mai ai au i Savaii e faaoo i le Kapeneta, a o le vaaiga o Savaii, lafo mai la ia i le toeaina nei. Lafo mai, alofagia le falemai i Tuasivi, o le mea la e taoto ai gasegase, o le matua faaletonu pe a oo ina timu ma matagi. O le nofoaga le la e matagia tele. E le iloa le mea e fepisiai solo ai nai gasegase pe a oo ina faaletonu, ia alofa ia vave fai se vaifofo. Ma le isi vaega, o le tele o falemai i Savaii sa ou asiiasi i ai, o le latou mau lava lea, o le leai o se, ua faaletonu le ea i nofoaga e tatau ona i ai se ea malulu. O le mau na aumai, a faaletonu le vaega lea, e tau sue mai lava i Upolu nei, se isi e alu atu. O le isi lava lena faafitauli la e faaletonu, e leai se isi e vaaia le tulaga o mea faapea. E tatau ona i ai se tagata e tofia, e nofomau i Savaii ma asiiasi e faaleleia uma vaega ia. Ma le isi lava vaega sili ona taua, ia faanatinati ona oo atu le tui puipui i o tatou tagatanuu uma lava, ina ia taumafai e foia ai le faafitauli o lenei faamai sauua ua oo mai. O le vaiaso ua tuanai atu sa fai ai le faalauiloa a le Matagaluega i Savaii, sa aofia uma lava. O le taumafai e faalauiloa atu i le faataua o le tui. Aua o le toatele foi o i tatou e le manatu mamafa i lea vaega. Ae o le puipuiga o le mamalu o si o tatou atunuu, e faamoemoe... e leai se mea tatou te alofaga i ai i le sau a le faamai. Ae faafetai i atunuu ua fesoasoani mai i vailaau. O le toatele o isi e mumusu e tui, ona ou tau mafaufau lea, se ana tele ni au tupe ua ou ofaina, e o atu e tui ae ou totogia tagata e o atu e tatui. Ae o le faalavelave e mativa si toeaina.

Ona pau lava lea o le Matagaluega ou te fia oo i ai o le Matagaluega lea o le Soifua Maloloina, aua foi, e ao lava ona faamuamua le soifua o tagata. A soifua lelei se atunuu, ma manuia se atunuu o le a manuia foi lona tamaoiga ma lona atinae, ma fiafia uma tagata.

O isi mau Matagaluega, se ou te fia oo atu i ai, a o le faalavelave lena, ua oo mai lou sela, ua ou fia nofo i lalo.

Ae ou te faafetai atu i le tapuaiga a si ou itumalo, o lea ua outou faafofoga mai lou itumalo, ae onosai mai. O a lava fuafuaga mo le agai i luma mo le faaleleia o le tatou itumalo, o lea lava o le a taumafai i ai.

Ae ou te faatalofa atu ma faafeiloai atu, aemaise e faamuamua atu i le Afaigaluega Paia a le Atua. Ia faapea ona maua pea lo outou soifua laulelei aua le talaina o le finagalo o le Atua i totonu o si o tatou itumalo, ma ia alu pea ma le mana la outou upu i le finagalo o le Atua i totonu o si o tatou itumalo.

E le faagaloina foi le paia o lo tatou itumalo, ou te faafeiloai atu i le afio o lo outou aiga taulagi potopoto. Le afio o lau afioga Tofa ma lo outou aiga sa Tofa. Susu le susuga i le Maopu, le usoalii, alalatai lau tofa Tataufaiga. O le paia lava lea aua le falefitu. Le afio o lau afioga Toleafoa ma Vaafusuaga alalatai lau tofa Segi o le matuafetalai, faapea alii na paea lau aufono. Alalatai Leulu ma Laupule, le falelua ma le mamalu tele ia Salemuliaga. E le faagaloina foi le afio o le paia o le toaono o le alii o le Faga, le paia o lo outou toafa, tagata matutua ma le mamalu tele i le Faleaana. Le afifio o sao ma tamaitai, faletua ma tausii aemaise o le malosii o si o tatou itumalo.

E le faagaloina foi i le manatu ma se tautalaga, le paia o si o tatou itumalo o lo o faapena ona afifio ma alalatai i atunuu mamao, so o se tafa o lenei lalolagi o lo o outou afifio ai. Faafetai tele aua o lo o susue pea le faamalama ma outou silasila mai i si o tatou itumalo. E faafetai atu i lo outou alofaaga molipo mai mo i matou. Matou te maua pea la outou faatasi mai e ala i sootaga faaneionapo, e pei ona aumai i luga o upega taufailagi a outou faamanuiaga. Aemaise foi o lo outou aao mafola i lo outou foai mai i so o se auala. E manuia ai o tatou aiga, o tatou nuu ma le tatou itumalo, faafetai tele. O le tatalo, ia faamanuia le Atua i lo outou nopi ai ma lo outou afifio ai i na atunuu o lo o taumafai e saili mai se manuia mo si o tatou atunuu nei, aemaise o si o tatou itumalo.

Ou te manatu lau Afioga i le Fofoga Fetalai, o lea ua maea atu si au faafetai i si ou itumalo, ma lau tatalo i si ou itumalo, onosai mai. Ua ou manatu o lea o le a ou talosaga e aveese sou totogi e maua, ua ou alofa i le utiuti o le faasoa. A i ai sou totogi, aua le faia, tuu i ina. A o faafofoga mai si ou itumalo, o lea o le a le totogia au, ae aua tou te toe o ane ia te au pe a ou alu atu. Ia outou alofagia, se o le toeaina nei, e masani i le uu, masani i le motu. A uu le toeaina, se o le matua fefete lava, ae a motu, e matua pe ifo i lalo. Ae ata lava, e masani i le motu, e masani foi i le uu. A o faafofoga mai lo tatou itumalo, e pei lava ona saunoa atu le tofi o Palauli, se i maua sau loan ona tatou feiloai lea ma avatu sou oo, ae aua tou te faitio mai pe a tuai ona fai se oo o le toeaina.

Le paia e o lau afioga, e avatu lau faamalo, e faamalo i le taumafai e ui lava ina feagai ma fita ma faigata, o tuuaiga i le tulai mai o lau afioga i le faafoega

o le tatou Maota nei, ma le fonon mamalu a le tatou atunuu e faafetai atu, faafetai tele lava.

Ou te faafetai atu i lau Afioga i le Palemia. Ina ua oo atu ia Valasi ma le itu a le SNDP, na o atu pepelo au. Fai mai, o lea o le a sau Fiamē i le tatou Vaega, ou fai atu, e a ea. Uma lava o tatou faatasi i le Maota o Samoa, ou te le i vaai lava ia Fiamē. Ou fai atu ia Valasi, o fea ea Fiamē, ae fai mai o la o le a sau. Ou toe sau i le isi fonon, aua e fai lava sina umi o tatou feiloai, e leai lava se Fiamē. Na afio atu loa Fiamē, ou fai atu ua uma, malo tatou. Ioe, faafetai Fiamē, leaga na filifilia oe e le Atua e taitai lo tatou aiga, faafetai tele lava. Ou te talitonu o le tofia o lau afioga o le tofiga mai le Atua, ia e lototele ia maua pea lou agaga faamoemoe i le Atua lou valaauina.

Lau Afioga i le sui Palemia, se faafetai, faafetai aua a na e tulai atu loa tatou faatasi, toe faapea foi lea, ua tulai mai. O lea lava la ua aveaveai.

Ae faapitoaugafa sau faafetai i le afioga i le Laauli, faamalo toa, 300 moliaga o oe i le faamasinoga, leai se mea e tasi na faamaonia, faafetai. A foi lena out e fai atu ai, le paia i le Kapeneta, Olo, o lau upu lava lea e faapea o le olo e le aea e se isi, o le faaumi lena o lou suafa. Sole, e leai se na mea o se aea, se e ta lava oe e le tagata e pau ifo. Aua e te, ua e tau fia show laititi, aua, ia outou manatua lo outou valaauina, fai ma le faamaoni, a leai ni outou totogi, aua ne i outou tagi i outou totogi, faapau outou totogi. A lea ua ofo atu au e leai sou totogi. E tusa lava pe leai ni tatou totogi. E a, sole na o au upu ae ou te manao e totogi. Talofa e, o le isi lea tagata e ese lou fiafia i ai, o Wayne Fong, e ese le toa o le tagata, faafetai lava. E 11 au Matagaluega ia e tauave, se faafetai. Alu ma le faamaoni, ioe, aveese le mea lea o le fai mea ma se tau i ai, aua. Ia outou alolofa mai.

O le Minisita o Leoleo se o le toa le isi tagata lea. E faafetai i lou tulai mai. Sa o tatou oposisi uma lava, ae o lena ua e tulai mai i ina ae o lea ou te saofai atu i i. Ioe, o lena ua e tu mai matagiolo, ae tu atu le toeaina i le matafaga. Ia manuia lou tulai mai, faapena foi ma Sui Minisita.

Le Minisita o Tupe, se ua ou le iloa le upu e fai atu, faafetai faafetai tele lava. Ia toa lou loto. O oe foi o le uluai Minisita tamaitai foi lea o Tupe o si o tatou Malo. E sau lava i lau faalogo, sa sau lava i lou sau, e faafefea ona iloa e lenei, o le a lona tomā faa... sole ae leai. Aisea? O la e i ai le Atua, po o le a lou vaivai, a faatasi le Atua, o outou uma lava.

Leota, sole tasi lea toa manumanu, Leota Laki. Ioe, faamalo faafetai i lau Matagaluega. Ua fiafia lava ia tofi pulenuu ua maua le latou siitaga, faamalo faafetai, ae talofa e i le Minisita o Faamasinoga. Talofa e Matamua, o ou mama na, lototele aua o le tou Ofisa, ia o lena lava ua faatiulaumea ia le tatou i faaiuga a le Faamasinoga. Ia manuia lou tulai mai Matamua.

Oi le uso e ia Seuula, faafetai i lou tulai mai. O le tasi lea Matagaluega sili ona taua. E taua uma lava ia Matagaluega, aepeitai ane faafetai i lou tulai mai. Toelupe, faafetai e ese foi lou tulai mai. Na e saunoa mai ia te au e ta te faatasi avatu au e fai ma au.. sole ou te leiloa na mea o tekonoosi ou te le

iloa na mea. Ia ana e finagalo ou te alu atu e ta te toalua, ia ae ou te faafetai i le Afioga i le Palemia ua maua mai sou avanoa ou te Minisita ai i Falemai i Savaii. Ioe, faafetai i lau Afioga i le Palemia mo lau tofiga o le toeaina nei, faafetai tele.

Ou uso uma e talofa e... ese le tou lauga manaia sole i lau faalogo, ae talosia ia taunuu outou manaoga na e... Faamolemole a outou Afioga i Minisita aua aumai i ai le tali foi lea lafo mai, lafo mai. Ia ona nofonofo ai lava lea ia faafetai tele i saunoaga a lau... ese lou poto e lauga.

Lau Afioga i le Sui Fofoga Fetalai faamalo, le paia e o le aufaigaluega a le Ofisa o le Fono Aoao Faitulafono, faamalo faafetai i la outou tautua, faafetai tele. Le mamalu e o le aufaigaluega, e matou te... ia outou alofagia lo outou tulai mai. Ia outou... aua tou te faapea e ese ia lenei Faigamalo tulai mai e tou te le fiafia i ai, aua!

Na ou oo lava i le falemai i Tuasivi matou talanoa ma le aufaigaluega, o lau timaiga muamua lena. Afai e i ai nisi o le tatou aufaigaluega i Tuasivi nei i le falemai e le fiafia i le Faigamalo lenei, ia outou aveese. Aua foi faapea e le tumau ai. E uma atu foi lenei nofoaiga toe tulai mai isi ae o le galuega faatino ia aua ne i tusitusi lima pe vaavaai.

Le paia e o le aufaigaluega paia, Faauluuluga o Matagaluega a le Malo ma Faalapotopotoga Tumaoti o le tatou Malo, galulue ma le faamaoni, tatou galulue faatasi, o la e soifua le Atua. E tau le tagata e tusa ai ma lana galuega. Ia outou manuia ma ia aua ne i faamatatasi la outou auaunaga. Ia matua alu atoatoa i ai. A uma foi lenei Nofoaiga, ia toe tulai mai se isi... ia se tumau pea ia lo outou soifua auauna.

Ia o lea ua faaiu atu si au... ia manuia tele le tapuaiga a si o tatou atunuu, paia ma mamalu faale-malo, ia aemaise mamalu faale-atunuu. Ia ae a mamalu faale-talalelei, ia manuia tele le tapuaiga a Samoa, ola le mea nei o le toeaina. Soifua ma ia manuia.

Na faaalua le agaga fiafia o le Maota i le patipati o latou aao i le maea ai o le Saunoaga Faa-Minisita a le sui usufono mo Faasaleleaga 4.

FOFOGA FETALAI: Malo faafetai malele, ia te oe le tama matua lau Afioga Tea, sui usufono mamalu mai Faasaleleaga Nu.4. E talitonu foi ua faafofoga vaotui le mamalu o le Maota, ia aemaise foi le faafofogaaga a Samoa aemaise foi si ou itumalo, ia i le saunoaga tuusao ma le saunoaga matagofie a oe le tama matua.

Lea foi ua oooo lava au faamanuiaga i le Afioga i le Paia ma le Kapeneta ia ma sui usufono uma ia aemaise foi le mamalu o le aufaigaluega a lo tatou Malo, ia talitonu lava o le a le toelele ia le faamanuiaga a oe le tama matua. O le mea lea e tatalo lava ia maua pea lou soifua laulelei ma le malosi, ia talitonu tele foi lou sao i totonu o le Maota, ia e faatonu folau ai foi ia sui

usufono mamalu o le Maota. Ia o le mea lea ia malo faafetai ia te oe le tama matua, ia faafetai mo saunoaga.

Ia ou te manatu o lenei taimi ua maua foi le avanoa mo se tasi o sui usufono mamalu ia e fia saunoa i le tatou Tala o le Tupe. Ia e matau atu ia lea ua saunoa mai ia le sa o le sui usufono mamalu mai ia Salega Nu.1. le Afioga ia Fepuleai, ia o lou avanoa lenei. Ia ma le agaga faaaloalo.

SAUNOAGA FAA-TAUPOU

Afioga FEPULEAI FAASAVALU FAIMATA SUA (Salega 1): Faafetai i le avanoa i lau Afioga ai i le Fofoga Fetalai, e tusa ai foi ma lenei usugafono a lenei itumalo mai Salafai. Ae ua tulai ia tulai ia Fepuleai Faasavalu e faailo se leo aua foi le usugafono a o se tapuaiga a si ou itumalo pele o Salega. E ui lava ina ua vaeluaina le tasi ma le lua, ae le vaea falaooto, o le tuituitutu ma le vanonofu, o Samoa ua uma ona tofi. E! Fia masae le lagi ia te oe, ma ia e afio mai, ma ia tafe mai mauga ou manuia. E fia liua lou ulu ma suavai ma ou mata ia liua ma puna loimata. O le alofa ma le faamaoni ma te fetai. A o le amiotonu ma le filemu ma te feasogi. E tupu ae le faamaoni i le lalolagi, ae silasila mai le amiotonu mai le lagi. Ua malie matamemea le aniva nai le aopouli faapei o le maimoaga a le tootoo na i Mataisaua. O le matega foi sa tu i le faga i Lefaosea, lele ua tafia i fisaga o manu. A o le tala i le nuu aupito i le siu o Salafai, fai mai sa faatau silime ma matega le faatalitaliga uaga aua le Tagalooaopo mai le lagi. Ou te manatu o le ogavasa ua uma ona aloa, ma sae e apefoe matamataloloa, o le fueta ma le fuelafo. A o faasau autala faalaufala le tootoo ua mavae, e le toesea pe faaopoopo pe a ou laa i ai.

O le paia foi o le maota ma tootoo, o laoa fetalai, e taoto lava a o se ala ua oo. Lele ua tasisi e le Atua pola o le lagi ma faasuluia eleele sa o Samoa i ave fetosiai o le la. Ua faaopoopo le aso i le kalena o lo outou soifua ma sou ola vaivai. Leitioa a alaga le aliiseu ma faailo le lupemua, se leitioa foi a tapisa le talitoga ina ua lalelei le foga o le ie. Sao, sao, sao faalalelei, ua malieo ua malie faasao. Le Atua faafetai i au faiga, ia le aunoa le viiga i lou gutu, ou te pese i lou matautia, aua o lo'u ola sa i ou aao, ua e faamamaluina se tagata valea, a o se vaivai ma se faatauvaa. Le Atua e, lolou maia lou lagi, lou poto ma le upu mai lou fofoga e te ufitia ai lenei Paeaiga 17 ne i matou sese atu i faaosoosoga a le manufeai. Aua o le gaoui, e leai se isi mea na sau ai, na o le gaoui, fasi ma faaumatia ma faavevesi le lalolagi. O le faiva o le seugalupe, o le faiva o le tamalii, o le faiva o tupu.

Ou te manatu i le taeao lenei, ou te manatua ai lava le seugalupe mai le afioaga o le Minisita o Fesootaiga. Na matuai vaai faatauvaa ai tagata i le tama na sau ma lana titilupe. Fai mai le tala, Sole, se matua e lafulafua, vaai i lou ulu e vaivaia. Fai mai le tali a le tama, "E lafulafua a o le tama e seugogo

ma lupe.” E faapena le silasila mai a tua i lenei Paeaiga i lau Afioga i le Palemia, talofa e. O le seuga a tamalii anamua, e seu le lupeula, fai mai o le lupe e mumu gutu ma vae ae tui faatasi i le titi, e le faatusalia le mumu o lou ofu. O le a lona uiga? A lea ua e titi, ua e ula. Leaga o oe o le Tuitogamatoe. Le paia e o le Maota Fono o Samoa, lau Afioga i le uluai taupou Palemia o Samoa, lau Afioga i le Sao na Faapito o Atua, Fiamē Naomi Mataafa Faumuina Mulinuu II. Lau Afioga i le Sui Palemia lau Afioga i le Saoalii, Tuala Tevaga Iosefo Ponifasio. Lau Afioga i le Fofoga Fetalai, leaga na e taliaina le uluai talalelei na perofeta mai ai le Tamaitai o Nafanua. Lau Afioga Papalii Oloipola Lio Taeu Masipau, Afioga i alii ma tamaitai Minisita o le Kapeneta. Afioga i Minisita Lagolago ma le mamalu o sui usufono o le Maota, ae a le afio mai i lo outou talaga o afioga i Ofisa Sili o Pulega o Matagaluega a le Malo ma Pisinisi Tumaoti.

E le faagaloina lau Afioga, lau Afioga i le Failautusi o le Fono ma lou auvaa. O lenei ua tatou aeaie i manu ua ulu ua tatou see i maaomalie. Talofa e, talofa e i le Sao na Faapito o Atua o le Tuitogamatoe, fai mai e tausī e aliimau ma faleupolu, o le vaa e taumualasi i faigamalo, ae a Sitagata ma le Aiga Sa Sitagata. Talofa i le Mulipola, se fai mai o oe o le Fuatino e tausī e Faatoafe ma le nuu faigata. Talofa ia Matamua o le aliitasi a Tapaau ma Salelologa e faamemelo i ai le falefia ma lana falepulega ma le mamalu i le Falesalafai. Ua tuu i lalo lo outou tamaliiaga ona o le faapolokiki. Talofa, talofa e. E lafalafa lava tuna, ua tofofi outou e le Atua e faaauauina gafa o aiga. Amuia laualo na e fanau mai ai, amuia matavaitoa na e mitiia, ua fai oe ma faamafatotoga ia Samoa i lenei vaitau, ona o lau taitaiga lau Afioga i le Palemia. Faafetai Fiamē. O fea lava le mea sa tagi mulimuli i ai le Vaega Faaupufai, e le galo ia Samoa lou faasinomaga. O le uluai Palemia Tamaitai o Samoa, o lou lea faasinomaga. Timu pe la, matagi pea afa, o le a le tau, sa e mulimulitai lava i lau Vaega Faupufai aua le sailiga manogi i le taimi ua sola. Ou te faafetai foi i lau Afioga, na tafa lou finagalo ma e malaga i Salafai, ma e asia ai le Ekalesia i Malaefia i Samataiuta e te fia tapuai aua le aso maliu o lo tatou Faaola. Paga lea, e faitau eseese Tutuila ma Ape i nisi o sui tauva.

Ae ou te viia le Alii aua e moni le mea malosī, e malosī le mea moni ae le umi se togafiti. Ua ati le fao. Laauli Tupua Asiata Puletiuaotoa. Olo Muagututia Fonoti, Leatinuu Misa Faumuina, ua tau le ta, ua ati le tao, tulou. I le aso mulimuli o le faaumaga o le Paeaiga, na ou tagi ma ou faapea, oi talofa e, ua fasia tama a o fea? Ua susunu outou tamaliiaga tulou. So o se maa lava e lamolemole sa faigaluega ai le vai o le agaga. A lea ua iila le auro moni mai le lagi, e i ai le aso lenei. Leitioa a pese le tamaitiiti Eperu ma fai mai, “O Ieova o lo’u leoleo, ou te le mativa, e taumasuasua le ipu.” Ia tele pea le viiga i le Atua. Pe ou te tu i Mataiiliili ma Tapapa ma fotuai mai Malaefia agai i le Malaeolema, e ao lava ona ou faatulou. Pe tuta foi le taetafe na ou apaapa mai ai i le vasa, le tuasivi i le penisula, eleele o lo o

taoto ai tupu o Samoa. Fai mai o lo o i ai le Malae i Tiafau nei, le malae fai mai na utu ai le tagi, na mou ai le fememeai, ma sola ai le moeiteite ma moetoto ona o le sailigamalo a ni o outou tuua ma sou matua. Le malae fai mai na aveese ai le fefuliai o patua ae fusi le fau o Malo, lea ua tini i le aso lenei. Tulouna ou paia le popo ma ou papa tuloto, o papa le gae o tupu ma falalesee i faleupolu. Amata mai le taisamasama o le Tuimanua seia paia Fili ma Puletuu.

Tulouna le paia o Aiga ma latou Tama o Tama ma Aiga. Tulouna le afio o lau Afioga i Le Ao Mamalu o le Malo o Samoa ma lau Masiofo, lau Afioga i le Sui Ao ma lou faletua. Tulouna lau Afioga Tuiatua Tupua Tamasese Efi ma lau Masiofo, tulouna lau Susuga i le Malietoa fai mai e faalogo ia te Oe Samoa.

Tulouna lau Afioga i le Fofoga Fetalai, Papalii Lio Taeu Masipau. Tulouna lau Afioga i le Palemia, lau Afioga Fiaame Naomi Mataafa. Tulouna lau Afioga i le Sui Palemia lau Afioga Tuala Tevaga Iosefo Ponifasio, le paia ma le mamalu o le nofo a Minisita o le Kapeneta, aemaise le loaloa o le Maota nei i sui usufono.

Tulouna Tumua ma Pule, Ituau ma Alataua, Aiga i le Tai ma le Vaa o Fonoti, tulouna le paia lasilasi i le aufaigaluega tofofi a le Atua. O la outou galuega fai e te faatuli gauai i le Atua, ao ma le po, po ma le ao e te asamo i le lagi, to se manu mo Samoa ma ona upufai ma ona tagata lautele.

Tulouna le motu i Sasae, Fofu ma Aitulagi, Saole ma Saleaamua ma le Launiu na Saelua. Tulouna Faatuiolemotu, Tama a le Manuatele ma le Laau na Amotasi, le Tootoo o le Faleula, tulou, tulouna lava.

Tulouna lau Afioga i le Faamasino Sili ma le Matagaluega o le Faamasinoga. Tulouna lau afioga i Ofisa Sili o Pulega o Matagaluega taitasi. O paia ia ma mamalu ua i Maota nei i Tiafau.

Lau Afiog i le Fofog Fetalai, fai se tala i si ou itumalo. Pei lava ona ou faailo i le amataga, e ui lava ina vaelua Salega i le 1 ma le 2, ae le vaea le falaooto i le matou va nonofo. Le tuituitutu, tulou lau Afioga i le Minisita Olo Fiti Afoa Vaai. Tau lava ina ou pai atu, leaga mai Mataiiliili ma Tapapa seia paia Fetoloai ma Vaimoliai, o le tausiga lea a Tuisalega ae fau i lau tofa tupu o le itu ma alii o le itu, tapaaui o le itumalo. Ua loloto le taisua.

E le faagaloina Afia i si ona vao. Ou te faatulou aloaia i si ou itumalo o Salega Nu.1. Mai lava i Fagafau, Samataiuta, Samataitai, Fogatuli ma Faiaai. Ou te faatulou atu i le paia o le...

FOFOGA FETALAI: Ou te vaelupeina le saunoaga matagofie a le sui usufono mamalu mo le itumalo palota mai Salega Nu.1. Talu ai ona o lea ua tatou taunuu i le taimi malolo e tusa o le lafo ua faamaonia, o lea ou te faamalulu atu ai i le sui usufono mamalu, o le a faaauau lau saunoaga pe a toe taliu mai i le tatou malologa.

Mo le silafia e le Maota, ua tapena e le tatou Ofisa le taumafataga o le aoauli tatou te talisua faatasi ai ma sailiili malosi ai mo le toe faaaauau ai o le tatou galuega.

O le mea lea ou te faasilasila atu ai, o le a faataatiaese Galuega a le Fono Aoaofa Faitulafono mo lana malologa o le aoauli ona tatou toe tauaofia ai lea i le itula e 2:00 o le aoauli lava lena. Faafetai.

Na faataatiaese Taulumaga a le Fono Aoaofa Faitulafono i le itula e 1:05 i le afiafi.